

Malaysia kutuk serangan terbaru Vietnam

KUALA LUMPUR, Jumaat — Malaysia mengutuk serangan tentera Vietnam ke atas khemah-khemah awam di sempadan Kampuchea yang menyebabkan ramai orang awam terkorban dan cedera, Datuk Seri Dr Mahathir Mohamad berkata, hari ini.

Menurut Perdana Menteri, serangan-serangan ke atas orang awam itu tidak boleh disifatkan lain daripada serangan terhadap kemanusiaan.

Bellau juga memberi jaminan kepada kerajaan Demokratik Kampuchea (DK) tentang sokongan Malaysia yang berterusan terhadap perjuangan rakyat Kampuchea untuk mendapatkan semula kemerdekaan negara itu.

Ia juga berikrar akan meningkatkan usaha mencari penyelesaian politik yang adil kepada masalah Kampuchea di dalam forum-forum antarabangsa, berasaskan ketetapan Bangsa-Bangsa Bersatu dan perisytiharan ICK.

Berani

Bahan asal dari Arkib
Negara Malaysia

Jaminan itu diberi oleh Datuk Seri Dr Mahathir kepada Perdana Menteri Demokratik Kampuchea, Encik Son Sann yang mengunjunginya di bangunan Parlimen di sini, petang ini.

Dalam pertemuan itu, Encik Son Sann memberi taklimat kepada Perdana Menteri tentang serangan-serangan terbaru tentera Vietnam ke atas khemah-khemah awam, menyebabkan banyak jiwa terkorban.

Ketua Setiausaha Kementerian Luar, Tan Sri Zakaria Ali yang turut menghadiri pertemuan sejam itu memberitahu para pemberita, Datuk Seri Dr Mahathir menyatakan harapannya untuk melihat kerajaan DK dan rakyat Kampuchea mendapat semula kemerdekaan secepat mungkin.

Perdana Menteri juga menyatakan rasa gembira, kerajaan campuran DK dapat bekerja dengan baik untuk menentang pencerobohan tentera Vietnam dengan berani dan kekuatan serta semangat mereka semakin meningkat.

Menurut Tan Sri Zakaria, Datuk Seri Dr Mahathir memberi jaminan kepada Encik Son Sann bahawa Malaysia akan terus memberikan bantuan dan sokongan kepada kerajaan DK mengikut kemampuannya.

Tetapi, beliau menegaskan, bantuan itu hanya setakat bantuan kemanusiaan.

Tan Sri Zakaria berkata, Encik Son Sann tidak menyatakan dengan khusus bantuan yang dikehendakinya.